

La lenghe furlane in Olande al MEM - Livingroom of languages cun ARLeF e Dj Tubet

Inte suaze des iniziativis che tal 2018 a son stadis organizadis a Leeuwarden, capitâl de Frisie olandese nomenade “Capitâl europeane de culture 2018”, e je ancje la interessante rassegne inmaneade di Afûk - la organizazion pe promozion des lenghis e culturis frisonis - *Mem, Livingroom of languages*. Intal mieç dal parc de citât, intun paveon costruît a forme di grande cotule di indulà che a nassin dôs figuris femininis, a son daûr a celebrâs lis lenghis maris de Europe: i dialets, lis lenghis regionâls e chês minoritariis.

Plui di trente comunitâts linguisticis, adun cun chê frisione, a son protagonistis di chest event olandês: tacant di Març fin a Otubar di chest an, ogni setemane e je dedicate a di une lenghe diferente che al MEM si fâs cognossi ae popolazion e aes scuelis cun incuintris di culture, poesie e teatri, workshops e cusine, dibatits, concerti e mostris. La domenie e je il moment di passaç di testimoni fra une comunitât linguistiche e chê altre, zornade che e devente ancje ocasion par performances e concerti di fâ insieme, messedant lenghis, stii e sunôrs.

Dai 12 ai 19 di Avost, il paveon Mem al à celebrât il Friûl e la lenghe furlane cuntune schirie di iniziativis coordinadis de ARLeF - Agjenzie Regionâl pe Lenghe Furlane che e à sielzût tant che testimoni Dj Tubet (Mauro Tubetti), musicist cognossût cuntune lungje cariere, rapper - freestyler che al messede furlan e altris lenghis intune contaminazion di gjenars musicâi hip hop, dub, raggae, fin al funky-jazz.

La setemane e je tacade cul passaç di testimoni fra la comunitât asturiane, protagoniste de ultime setemane al Mem, e chê furlane cuntun concerti dal grup asturian Xera insieme a

Dj Tubet. Il rapper furlan al à fat une jam session cul grup locâl frison Jolli F. e partecipât a esibizions e intervistis cu lis radios e tv locâls e di altris minorancis; cun di plui al è stât impegnât intun laboratori sui valôrs pedagogjics e didactics dal hiphop e dal free style.

A metât setemane e je stade screade cun sucès la mostre “Furlan lenghe de Europe” curade dal diretôr de ARLeF William Csilino che, in 14 panel bilengâi (furlan e inglès) e à presentât une panoramiche de storie, de culture e de lenghe dal Friûl.

A sierâ il focus su la lenghe furlane, dongje dai dibatits, e di cercis di plats tipics furlans, ancjemò la musiche cul concerti finâl in lenghe furlane e papiamento: Dj Tubet e la comunitât des Antilis di Leeuwarden.

Une setemane plene di braûre pal furlan e pal Friûl, che e à lassât la sò olme ator pe Europe ancje cu lis peraulis furlanis, scritis tai cops dal paveon Mem: une cotule fate di un patchwork di lenghis, dutis chês che a àn cjapât part a cheste bielissime iniziative di Afûk.

